

թվում է, այնքան էլ բացահայտ չի եղել, ինչպես փորձում են ներկայացնել ան-Նասավին և Ռաշիդ աղ-Դինը: Պետք է անալոյման հաշվի առնել նաև այն հանգամանքը, որ Զալալ աղ-Դինի բանակին, «անհավատների» դեմ ելնելու նրա կողերի ազդեցությամբ, հաճախ ուղեկցում էին նաև որոշ տեղական մահմեդական իշխանավորների ու զանազան քոչվոր թուրքմենական ցեղերից կազմված զորաջոկատներ¹¹:

Սկզբնաղբյուրները բավական համերաշխ են ներկայացնում ճակատամարտից առաջ երկու կողմերի զորքերի նախնական դասավորությունը, կովի ընթացքն ու ելքը: Հայ-վրացական զորքերի՝ Գառնիի մոտ, բարձունքի վրա տեղակարգվելու մասին ան-Նասավիի վկայությունը¹² հաստատում և լրացնում են Կիրակոս Գանձակեցին («Իւանէ... կայր հանդէպ նոցա ի վերոյ»)՝¹³ և Միխայել Ասորու ժամանակագրության հայ շարունակողը («Իջաւ (Իվանեն—Հ. Մ.) ի լեառն Գառնոյ, որ կոչի Աղուջերմն»)՝¹⁴: Իվանեի բանակի այս գերադասելի դիրքը, որ հնարավորություն էր ընձեռում հարձակման համար, հայ-վրացական զորքերը չօգտագործեցին: Կիրակոս Գանձակեցին նույնիսկ Իվանեին մեղադրում է երկշտուրթյան մեջ՝ «տեսեալ զնոսա (խորեզմցիներին—Հ. Մ.) զանգիտեաց, զետեղեալ ի տեղւոջն»¹⁵: Նկատելով դա, Զալալ աղ-Դինը որոշեց նախահարձակ լինել. խորեզմշահի հետ միասին գրոհի նետվեց նրա բանակի ձախ թևը, որտեղ դասավորվել էին նետածիզները՝ հակառակորդին հեռվից հարվածելու համար¹⁶: Իվանե աթաբեկը խորեզմցիների հարձակմանը դիմագրավելու համար ուղարկեց առաջապահ ջոկատը՝ Շալվա և Իվանե Ախալցխեցի իշխանների գլխավորությամբ: Ինչպես պատմում է Վրաց ժամանակագիրը, «Երբ մերձեցան [վրաց] նախահարձակներն ու սուլթանը, այն ժամանակ Իվանե աթաբեկը ոտը կախ գցեց: Ասում են, քե թշնամություն կար [մրա] և ախալցխեցի Շալվայի ու Իվանեի միջև... Վրաստանի հիմնովին ավերմանը զորեց, ինչպես ստորև կերևա, երբ Իվանե աթաբեկը մարտի ժամին ետ կանգնեց և այլևս չէր գնում դեպի մարտնչողները: Մինչև բոլոր նախահարձակները մարդ ուղարկեցին [Իվանե աթաբեկի] մոտ և ասացին. «[ընդհուպ] մոտեցել ենք սուլթանին ու նրա բանակին, մենք խիստ սակավաթիվ ենք, և ծանր մարտ է մեզ սպասում: Ուղարկիր մեզ [օգնության] թագավորական քաջ զորքերն ու քաջությունը քո»: Այսպես երկու-երեք անգամ [մարդ] ուղարկվեցին, սակայն նա ոչինչ չէր պատասխանում... Իվանե աթաբեկն ու վրացական զորքը տեսնում էին ուժգին մարտը և չէին խղճում ազգակիցներին ու հավատակիցներին՝ Քրիստոս խոստովանող թորեցիներին ու նրանց հետ՝ բազում անվանիների, այլ կանգնել էին հեռվում, և Իվանե

¹¹ խորեզմցիների բանակի խայտաբղետ կազմի մասին վկայում է Կիրակոս Գանձակեցին. «Եւ կուտեաց (խորեզմշահը—Հ. Մ.) զօրս անթիւս ի պարսից, և ի տաճկաց, և ի թուրքաց...» (Կիրակոս Գանձակեցի, Պատմութիւն Հայոց, աշխատասիրությամբ Կ. Մելիք-Օհանջանյանի, Երևան, 1961, էջ 224): Զալալ աղ-Դինի և թուրքմենական ցեղերի ու տեղի տիրողների համագործակցության մասին այլևայլ աղբյուրով խոսում է նաև ան-Նասավին (ан-Насави, с. 149, 160—161, 279—280):

¹² ан-Насави, с. 158.

¹³ Կիրակոս Գանձակեցի, էջ 224—225:

¹⁴ Միխայել Ասորի, ժամանակագրութիւն, Երուսաղէմ, 1870, էջ 527:

¹⁵ Կիրակոս Գանձակեցի, էջ 225:

¹⁶ ан-Насави, с. 157—158.